

Na osnovu člana 12. stav 1. tačka c. i člana 18. stav 1. tačka b. Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00 i 4/01), Skupština Kantona Sarajevo, na sjednici održanoj 12. jula 2001. godine, donijela je

ZAKON

O ESTRADNOJ DJELATNOSTI

I - OSNOVNE ODREDBE

Član 1.

Ovim zakonom uređuje se estradna djelatnost kao dio kulturnih i umjetničkih vrijednosti na području Kantona Sarajevo (u daljem tekstu: Kanton), status i djelovanje estradnih izvođača, estradnih umjetnika i samostalnih estradnih umjetnika, poslovanje sa privrednim društvima, ustanovama, udruženjima i drugim pravnim licima, organizovanje i posredovanje u javnom izvođenju estradnih programa i druga pitanja od značaja za estradnu djelatnost.

Član 2.

Pod estradnom djelatnošću u smislu ovog zakona podrazumijeva se pripremanje i javno izvođenje muzičkih, humorističkih, folklornih, artističkih, književnih, dramskih i drugih kulturno-umjetničkih i zabavnih programa.

Član 3.

Estradna djelatnost se obavlja putem koncerata, priredbi, revija i drugih oblika estradnog predstavljanja u objektima namijenjenim za kulturne programe: dvoranama, turističkim, ugostiteljskim i sportskim objektima i u svim drugim pogodnim prostorima za obavljanje estradne djelatnosti kao što su; trgovi, parkovi, sportske plohe i sl.

Estradnom djelatnošću zadovoljavaju se potrebe građana za kulturno-zabavnim i rekreativnim sadržajima i doprinosi raznovrsnosti oblika i sadržaja kulturnog života.

Estradna djelatnost se može obavljati samostalno u vidu zanimanja ili kao dopunska djelatnost.

II - UDRUŽENJE ESTRADNIH IZVOĐAČA KANTONA SARAJEVO

Član 4.

Udruženje estradnih izvođača će djelovati pod nazivom Udruženje estradnih izvođača Kantona Sarajevo sa sjedištem u Sarajevu, u ulici Kulina bana broj 22 (u daljem tekstu: Udruženje).

Udruženje se registruje kod Ministarstva pravde Kantona Sarajevo na način i po postupku utvrđenim zakonom kojim se uređuje udruživanje građana.

Prilikom registracije Udruženje je obavezno pribaviti saglasnost Vlade Kantona za unošenje naziva "Kanton Sarajevo" u naziv udruženja.

Udruženje se osniva radi afirmacije estradne umjetnosti i zaštite estradnih izvođača i umjetnika Kantona Sarajevo.

Dio sredstava za izvršavanje obaveza Udruženja utvrđenih ovim zakonom obezbijedit će se u budžetu.

III - POVJERAVANJE JAVNIH OVLAŠTENJA

Član 5.

Udruženju u oblasti njegove djelatnosti povjerava se vršenje javnih ovlaštenja i to:

priznavanje svojstva estradnog umjetnika (član 7. stav 4. ovog zakona i član 11.);

vođenje evidencije estradnih umjetnika i izvođača (član 18.);

davanje mišljenja i odobrenja (čl. 23., 25. i 26.);

donošenje rješenja i izdavanje uvjerenja, potvrda i drugih isprava o činjenicama o kojima odlučuje ili vodi evidenciju (čl. 14. i 30.).

Organizacija, djelatnost, prava i obaveze Udruženja u vezi povjerenih javnih ovlaštenja uređuju se statutom i drugim aktima u skladu sa zakonom, kojim se uređuje kantonalna uprava.

Na odredbe svog Statuta, Udruženje je obavezno pribaviti prethodnu saglasnost Ministarstva kulture i sporta Kantona Sarajevo (u daljem tekstu: Ministarstvo).

IV - ESTRADNI IZVOĐAČI I UMJETNICI

Član 6.

Javnim izvođenjem estradnih programa mogu se baviti lica koja:

imaju svojstvo estradnog izvođača po odredbama ovog zakona;

u skladu sa odredbama ovog zakona imaju priznato svojstvo estradnog umjetnika ili vrhunskog estradnog umjetnika;

u skladu sa odredbama ovog zakona imaju priznato svojstvo samostalnog estradnog umjetnika;

imaju priznato svojstvo samostalnog umjetnika u skladu sa odredbama zakona o samostalnim umjetnicima;

imaju svojstvo pozorišnog umjetnika odnosno pozorišnog djelatnika u skladu sa zakonom kojim se uređuje pozorišna djelatnost.

Strano fizičko lice ili domaće fizičko lice sa prebivalištem na području drugog kantona ili drugog entiteta koje na području Kantona namjerava da se bavi estradnom djelatnošću, obavezno se treba prijaviti u Udruženje.

Uslove za podnošenje prijave iz stava 2. ovog člana utvrđuje Udruženje u svom Statutu.

Član 7.

Estradni izvođač je lice koje se bavi estradnom djelatnošću, u pravilu kao dopunskim zanimanjem i koje tokom bavljenja estradnom djelatnošću nije steklo značajnija priznanja.

Estradni umjetnik je lice koje učestvuje u javnom izvođenju nekog od programa iz člana 2. ovog zakona i kome je to svojstvo priznato od strane Udruženja po osnovu bavljenja estradnom djelatnošću i priznanja koja je dobilo za svoje djelovanje na estradi.

Estradnom umjetniku sa više od 20 godina neprekinutog bavljenja estradnom djelatnošću ili koji je stekao značajna domaća i strana priznanja može se priznati svojstvo vrhunskog estradnog umjetnika.

Postupak i bliži kriterijumi za priznavanje svojstva estradnog umjetnika i vrhunskog estradnog umjetnika, kao i njihova prava određuju se posebnim aktom Udruženja.

Član 8.

Osnovne obaveze estradnog izvođača odnosno estradnog umjetnika su:

da se zalaže za kvalitet estradnih programa;

da plaća članarinu matičnom udruženju u skladu sa općim aktom toga udruženja;

da redovno ispunjava i druge obaveze utvrđene posebnim zakonom: porezi, doprinosi i dr.;

da u svojim javnim nastupima čuva ugled profesije kojom se bavi u skladu sa kodeksom ponašanja koji propisuje Udruženje;

Osnovne obaveze iz stava 1. ovog člana obavezna su sadržana članske iskaznice koju izdaje Udruženje.

Pored ovih osnovnih obaveza, Statutom Udruženja mogu se ustanoviti i druge obaveze estradnih izvođača odnosno estradnih umjetnika.

Član 9.

Domaći i strani estradni izvođač i estradni umjetnik mogu učestvovati u javnom izvođenju estradnih programa odnosno javno nastupati samo po osnovu ugovora sa organizatorom ili posrednikom registrovanim za tu djelatnost.

Ukoliko dođe do spora po osnovu ugovora iz prethodnog stava, koji ugovorne strane ne mogu razriješiti sporazumno, nadležan je sud u Sarajevu.

V - SAMOSTALNI ESTRADNI UMJETNICI

Član 10.

Samostalni estradni umjetnik je lice koje estradnu djelatnost obavlja samostalno u vidu zanimanja, a kome je to svojstvo priznato od strane Udruženja.

Svojstvo samostalnog estradnog umjetnika, Udruženje može priznati samo državljaninu Bosne i Hercegovine koji ima prebivalište na području Kantona .

Član 11.

Postupak priznavanja svojstva samostalnog estradnog umjetnika uređuje se općim aktom Udruženja.

Član 12.

Zahtjev za priznavanje svojstva samostalnog estradnog umjetnika, zainteresovano lice dužno je podnijeti Udruženju sa sljedećim prilogima:

biografijom podnosioca zahtjeva;

uvjerenjem o državljanstvu;

dokazom o stečenoj stručnoj spremi;

dokazom o iskustvu u estradnoj umjetnosti i osvojenim priznanjima;

dokazom o prebivalištu na području Kantona.

Član 13.

Udruga rješenja podneseni zahtjev uzimajući u obzir:

obrazovanje i osposobljenost kandidata za bavljenje estradnom djelatnošću;

nagrade i priznanja koja je kandidat dobio za svoje estradno djelovanje kako u zemlji tako i u inostranstvu;

period estradnog djelovanja.

Bliže kriterijume za priznavanje svojstva samostalnog estradnog umjetnika utvrđuje Udruga.

Član 14.

Svojstvo samostalnog estradnog umjetnika Udruga priznaje svojim rješenjem.

Protiv rješenja Udruga može se izjaviti žalba drugostepenom organu Udruga, koje je dužno da ovu žalbu riješi u roku od 30 dana od njegovog prijema.

Član 15.

Samostalni estradni umjetnik obezbjeđuje sredstva za doprinose za svoje penzijsko i invalidsko osiguranje te zdravstvenu zaštitu.

Ova sredstva za samostalnog estradnog umjetnika može obezbijediti i pravno lice sa kojim sklopi ugovor o saradnji.

Član 16.

Svojstvo samostalnog estradnog umjetnika prestaje u slijedećim slučajevima:

ako samostalni estradni umjetnik ne ispunjava obaveze iz člana 8. alineja 2. i 3. ovog zakona u trajanju dužem od tri mjeseca;

ako zasnuje radni odnos;

ako se dužem od tri godine ne bavi estradnom djelatnošću;

ako više nema prebivalište na području Kantona;

ako samostalnom estradnom umjetniku bude izrečena mjera sigurnosti zabrane vršenja poziva, djelatnosti ili dužnosti;

ako bude upućen na izdržavanje kazne zatvora u dužem trajanju od šest mjeseci.

Udruga iz člana 10. stav 1. ovog zakona, rješenjem utvrđuje postojanje odgovarajućih činjenica i prestanak svojstva samostalnog estradnog umjetnika.

Protiv rješenja iz prethodnog stava žalba se može izjaviti Ministarstvu u roku od 30 dana od dana njegovog prijema.

Član 17.

Prava i obaveze samostalnog estradnog umjetnika miruju za vrijeme:

odsluženja vojnog roka;

prитvora odnosno izdržavanja kazne zatvora do šest mjeseci;

trajanja krivičnog ili prekrajnog postupka koji ga čini nedostojnim bavljenja estradnom djelatnošću.

Član 18.

Evidencija samostalnih estradnih umjetnika vodi se u Udruženju.

Samostalnog estradnog umjetnika, Udruženje upisuje u evidenciju samostalnih estradnih umjetnika i izdaje mu člansku kartu.

Udruženje regulira posebnim općim aktom vođenje evidencije samostalnih estradnih umjetnika i sadržaj članske karte u skladu sa odredbama ovog zakona.

VI - POSLOVANJE ESTRADNIH IZVOĐAČA I UMJETNIKA

Član 19.

Estradni izvođači i estradni umjetnici mogu poslovati sa privrednim društvima, ustanovama, udruženjima i drugim pravnim licima, kao i samostalnim privrednicima na tržišnim osnovama.

Ovo poslovanje regulira se ugovorom o angažmanu ili posredovanju koji sadrži naročito:

učesnike u poslovanju;

predmet poslovanja;

vrijednost poslovanja;

međusobna prava i obaveze;

način ostvarivanja moralnih i materijalnih autorskih prava u skladu sa posebnim zakonom.

VII - ORGANIZOVANJE I POSREDOVANJE U JAVNOM IZVOĐENJU ESTRADNIH PROGRAMA

Član 20.

Organizovanjem javnog izvođenja estradnih programa može se baviti privredno društvo, ustanova, udruženje ili samostalni privrednik, registrovani za organizovanje estradnih programa i nastupa (u daljem tekstu: organizator).

Član 21.

Posredovanje u javnom izvođenju estradnih programa je dovođenje u vezu estradnih izvođača odnosno umjetnika sa organizatorima estradnih priredbi i nastupa.

U slučajevima iz prethodnog stava obavezno se zaključuje ugovor između posrednika i estradnog izvođača odnosno umjetnika o posredovanju.

Član 22.

Posredovanjem se može baviti privredno društvo, ustanova, udruženje ili samostalni privrednik, registrovani za obavljanje te djelatnosti (u daljem tekstu: posrednik).

Član 23.

Izuzetno organizovanjem javnih estradnih programa odnosno posredovanjem u javnom izvođenju estradnih programa može se baviti i humanitarna organizacija, druga organizacija, ustanova, udruženje ili drugo pravno lice ako je to od interesa za ostvarivanje njegove društvene funkcije.

U slučaju iz prethodnog stava organizator odnosno posrednik dužan je pribaviti odobrenje Udruženja.

Član 24.

Protiv rješenja Udruženja kojim se odbija zahtjev za izdavanje odobrenja iz prethodnog člana ovog zakona, dozvoljena je žalba Ministarstvu u roku od osam dana od dana njegovog prijema.

Ministarstvo rješava po žalbi u skladu sa zakonom kojim se uređuje upravni postupak.

Član 25.

Organizovanjem javnog izvođenja estradnih programa odnosno posredovanjem u izvođenju estradnih programa u inostranstvu ili sa inostranim estradnim izvođačima odnosno umjetnicima na području Kantona može se baviti samo organizator i posrednik koji je registrovan za obavljanje ove djelatnosti sa elementom inostranosti uz obavezno pribavljeno mišljenje Udruženja koje prethodi izdavanju radne dozvole za zaključivanje ugovora o obavljanju privremenih i povremenih poslova u skladu sa propisima kojim se reguliše zapošljavanje stranaca.

Ukoliko organizator ili posrednik prethodno ne pribavi mišljenje Udruženja ili ne dobije pozitivno mišljenje, Udruženje je ovlašteno podnijeti zahtjev Ministarstvu unutar njihovih poslova - nadležnoj policijskoj upravi radi zabrane održavanja estradnog programa odnosno nastupa.

Član 26.

Međunarodna kulturna saradnja u vezi vršenja estradne djelatnosti je slobodna, s tim da je organizator obavezan pribaviti mišljenje Udruženja, kao i sva potrebna odobrenja i saglasnosti u vezi boravka i rada stranih estradnih izvođača odnosno estradnih umjetnika u skladu sa odredbama ovog i drugih zakona i propisa.

Član 27.

U pogledu uslova za osnivanje organizatora iz člana 20. i posrednika u izvođenju javnih estradnih programa iz člana 22. ovog zakona primjenjuju se odgovarajući zakoni kojim se reguliše rad privrednih društava, humanitarnih organizacija, drugih organizacija, ustanova, udruženja i drugih pravnih lica.

Član 28.

Organizator je odgovoran za javno izvođenje estradnog programa u skladu sa odredbama zakona kojim se uređuju javno okupljanje i javni red i mir.

Član 29.

Svako oglašavanje javnog estradnog programa, pored oznake učesnika programa, obavezno sadrži naziv odnosno ime organizatora tog programa.

Član 30.

Kontrola sprovođenja odredbi ovog zakona u vezi pribavljanja potrebnih mišljenja, saglasnosti, odobrenja i dozvola povjerava se Udruženju.

Udruženje je ovlašteno da u slučaju kršenja odredbi ovog zakona podnese prijavu o počinjenom prekršaju sudu za prekršaje.

Udruženje najmanje jednom godišnje podnosi izvještaj o svom radu Ministarstvu.

VIII - NADZOR

Član 31.

Nadzor nad provođenjem ovog zakona i zakonitošću rada Udruženja u skladu sa odredbama ovog zakona vrši Ministarstvo.

IX - KAZNENE ODREDBE

Član 32.

Novčanom kaznom od 1.000,00 do 10.000,00 KM kaznit će se za prekršaj organizator odnosno posrednik:

1. ako ne pribavi odobrenje Udruženja iz člana 23. stav 2. ovog zakona;
2. ako organizuje javno izvođenje estradnog programa u inostranstvu odnosno sa inostranim estradnim umjetnikom na području Kantona ili ako posreduje suprotno članu 25. ovog zakona.

Za prekršaj iz prethodnog stava ovog člana kaznit će se i odgovorno lice u organizatoru ili posredniku, novčanom kaznom od 200,00 do 2.000,00 KM.

Član 33.

Novčanom kaznom od 1.000,00 do 10.000,00 KM kaznit će se za prekršaj organizator, ako za javno izvođenje estradnog programa angažuje lice za koje nisu obezbijeđeni mišljenja i odobrenja iz člana 26. ovog zakona.

Za prekršaj iz prethodnog stava ovog člana kaznit će se i odgovorno lice organizatora, novčanom kaznom od 200,00 do 2.000,00 KM.

Član 34.

Novčanom kaznom od 1.000,00 do 10.000,00 KM kaznit će se za prekršaj organizator, ako prilikom javnog oglašavanja estradnog programa ne navede sadržaj iz člana 29. ovog zakona.

Za prekršaj iz prethodnog stava ovog člana kaznit će se i odgovorno lice organizatora, novčanom kaznom od 200,00 do 2.000,00 KM.

Član 35.

Novčanom kaznom od 200,00 do 2.000,00 KM kaznit će se za prekršaj fizičko lice odnosno estradni izvođač ili estradni umjetnik ako:

učestvuje u javnom izvođenju estradnog programa na području Kantona Sarajevo suprotno odredbama člana 6. ovog zakona;

učestvuje u javnom izvođenju estradnih programa suprotno odredbama člana 9. ovog zakona.

Član 36.

Za utvrđeni prekršaj odredbi ovog zakona pored novčane kazne obavezno se rješenjem oduzima imovinska korist pribavljena izvršenjem prekršaja u skladu sa Zakonom o prekršajima, a po postupku i na način utvrđen Zakonom o prekršajima mogu se izreći i slijedeće zaštitne mjere:

zabrana obavljanja samostalne djelatnosti;

udaljenje stranaca sa teritorije Kantona.

X - PRELAZNE I ZAVRŠNE ODREDBE

Član 37.

Organizatori i posrednici osnovani prije stupanja na snagu ovog zakona dužni su uskladiti svoju organizaciju i djelatnost sa odredbama ovog zakona u roku od šest mjeseci od dana njegovog stupanja na snagu.

Član 38.

Udruženje estradnih izvođača dužno je uskladiti svoju organizaciju u skladu sa odredbama člana 5. stav 2. i donijeti akte iz člana 5. stav 2., člana 7. stav 4., člana 8. stav 1. alineja 4. i člana 11. ovog zakona u roku od šest mjeseci od dana njegovog stupanja na snagu.

Član 39.

Do priznavanja svojstva estradnog umjetnika po odredbama ovog zakona, lice koje se bavi estradnom umjetnošću ima status estradnog izvođača.

Izuzetno od odredbi člana 7. stav 2. ovog zakona, estradnim umjetnicima odnosno vrhunskim estradnim umjetnicima smatraju se lica zatečena u svojstvu estradnog radnika po odredbama Zakona o estradnoj djelatnosti ("Službeni list SRBiH", br. 25/84, 5/88, 20/90 i "Službeni list RBiH", br. 3/93 i 13/94), a koja se u roku od šest mjeseci od dana donošenja akata iz prethodnog člana prijave Udruženju radi upisa u evidenciju i pruže dokaze o odgovarajućem trajanju estradnog rada i stečenim priznanjima.

Član 40.

Danom stupanja na snagu ovog zakona na području Kantona prestaje primjena Zakona o estradnoj djelatnosti ("Službeni list SRBiH", br. 25/84, 5/88, 20/90 i "Službeni list RBiH", br. 3/93 i 13/94).

Član 41.

Ovaj zakon stupa na snagu osmog dana od dana njegovog objavljivanja u "Službenim novinama Kantona Sarajevo".

Broj 01-02-235/01 12. jula 2001. godine Sarajevo

Predsjedavajući Skupštine Kantona Sarajevo Miro Lazović, s. r.